



Author: R. K. Bhat

| Reviewer | Review Date | Status |
|----------------|-------------|---------------|
| Vishal Kachroo | 2024-09-19 | In progress ▾ |
| | | Not started ▾ |
| | | Not started ▾ |
| | | Not started ▾ |

अफसानु: पौत आलव

रूप कृष्ण भट

लग बग आँस्य अथ कथि व्वन्य देह वरी गॉमुत्य।
यानी कालु पगुहक्य यिमय बूज्यतव वुह वॅरी। नाथ जी
ओस कॅशीरि चलनु पतु स्योदुय जोम आमुत। अमि अपोर

गच्छिहे ति कोत। स्वर्ग ऑसिन सरवु काकस, ल्वक चारस
ओस तँस्य सुत्य अकि फिरि इनटरविव दिनि जोम आमुत।
पतु येलि नु गरिक्यव फोजस मंज़ गछनय ददयुतुस, जोम
युन ति गव बँल्यी। बमय पेयि सर्वकाकस लैकु तु थ्वकु,
दोपहस नाथस कँडुन कल फोजस मंज़ बँरती गछनु खॉतरु।
पानु ओस दरबदर गोमतुय सॉनिस शूरिस ति करि दरबदर।
खबर कमन बालन तु छालन लाग्यस। पतु बन्योव नाथु
पठवॉरदय तु रूद कँशीरि मंज़ुय। गरा अँकिस गामस तु गरा
बेयिस बराबर तथ दमस ताम योत ताम कँशीर त्रावुन्य
पेयस। अलबतु ऑसिस जेम्य शहरुक्य कँह नाव याद।
Iांदी नगर, रोIुनाथ मंदिर, परेड वगॉरु।

जोम वॉतिथ रूददय तिम केंचन द्वहन शिव मंदरचि
दरुम सालि मंज़ तु पतु पुरखू मैग्रंट कैंपस मंज़। देद याने
तारावती ति ऑस न्वशि नेचिविस निश अँती रोज़ान। व्वन्य

येलि नाथ जियुन निकु राजू बंबयि इनजीनीरिंग कॅरिथ
म्वकल्योव तु तस दिलि नोकरी लॅज तॅम्य बुलॉव्य यिम
सॉरी दिलि। दपान कथ ताम जान कंपनी मंज़ ऑसुस
नोकरी लॅजमुच्च तु तनखाह ति ओसुस जानुय।

राजू ओस नवि दिलि हुंदिस सिटेशनस प्यठ यिमन
प्रारान, मगर जेहलिम एक्सप्रस ऑस अज़ ज़ु गंटु लेट,
लिहाज़ा ओस प्रॉरदय प्रॉरदय पसरु आमुत। गरा पलेट
फारमस गथ दिवान तु गरा हेरु पाव्यन प्यठ बेहान। सु ज़न
बेहिये बेंचस प्यठ, सु गोछा कांह बेंच खॉली आसुन। पलेट
फारम ओस लूकव सुत्य खचा खच बॅरिथ। ऑखुर वॉच्च
यिथु तिथु अकि बजि बॉग्य जेहलिम एक्सप्रस। राजू लोग
एस ऑठस वॅन्य दिनि। देदि बिचारि ओस रॉत्य रातस
हसबि हाल गोमुत। नेंदरि ज्वल ति ऑसुस नु आमुच्च। हयुर
ओसुस ख्वशुक गोमुत। नाथ जियन वॉज अथस थफ

कॅरिथ। पलेट फारमस प्यठ थोवुन कदमुय योत तु वॅछ नाथ
जियस कुन, "तला नाथा बु हा च्यमुहॉ त्रेशि दामा, हयुर हा
छुम ख्वशक गोमुत।" मॉलिस माजि तु नानि नालु मोता
कॅरिथ रूद राजू सामानस रॉछ,रानी बीठ बेंचस प्यठ तु नाथ
जियन कॅर देदि अथस थफ तु नियन नॅज्यदौखुय अॅकिस
पां रेडु वॉलिस निशा। जोम वॉतिथ ओस देदि शुरदयन
हंदिस इसरारस प्यठ पनुन आदन कालुक प्वशाख फेरन
त्रॉविथ दूतय कॅरमुच। तमि रोट दोति लोंचि सुत्य शीशि
गिलास तु चेयन ग्रठ ग्रठ करान त्रेशि गिलास जोराह। तस
आव अॅछन गाश हयुव। नाथ जियन कॅड चंदु मंजु रूपय तु
पिलुनॉवन रेडु वॉलिस। यि वुछिथ गॉयि देदि ज़न अकलि
बकल। तस रूद नु ताब। स्व वॅछ नाथ जियस कुन हॉरॉनी
सान, "नॅ बा च़े कथ प्यठ दिचुथ अॅमिस रूपय डबल।"

" देयदी क्याज़ि त्रेश च़ेयथ ना? "

" नँ बा अदु पाँसु कथ? "

" देयदेय त्रेशि हय तु बेयि कथ ।"

" नँ बा त्रेश छा मँल्य आसान। अँमिस आया बँड बलाय। यि छुना मंदछान ति त्रेशि पाँसु रटनस " देदेय पख होर कुन"। नाथ जी गव हयबुंग हदयुव। तँम्य कँर देदि नरि थफ तु नियन रेडुवाँलिस निशि हना दूर पहन तु लोगुस समजावनि। "देदेय येति छिनु पां दँरदयाव। नँ छि नाग तु नँ आबशार। येति छि पनिच वेछय।"

" त्राहि त्राहि त्रेशि गिलास छा आँठन आनन। यि ति छा बूज़मुत जि त्रेश छे मँल्य। वुछ दयि कथ तावनस लॉगिथ, कथ द्रागुलद शहरस मंज़ लॉगिथ। येति छु त्रेशि गलयन ताम हिसाब। वन्यामय ना, बु हबा छस जेमी ठीक। मोनथम मा। तोति आँस ददवहस दोयि लटि पां गॉड्य

यिवान। वुनि छा पता येति क्या क्या आसि वुछुन। देदेय यि छेनु कॅशीर वारयाहन हुंद गुज़ारु छु येति त्रेशि प्यठय।"

"यि कुस बा गुज़ारु गव। यिमन छा बा अकुल राँवमुच्च। नँबा वति पकुवनिस त्रेशि दाम चावुन छुना दरुम।"

"देदि यि ओस तँती दरुम ति तु सवाब ति। येति छु यि पेशि। अथ कारस प्यठ छि येति सासु बँददय लूख पलान।

" हतु बा यि कुस बा कार गव। यिम हबा गछन सेदि स्योद नरकस। त्राहि त्राहि पज़ी हबा छु यि कलियुग"। देदि पेयि साजि याद। स्व आँस कथि कथि प्यठ वनान "तारावती यि हबी छु आँखरु ज़मानु"। राजू तु तसुंज मोज रानी आँस हॉरॉनी सान यिमन माजि पँत्रन हुंज द्रॉज द्रॉज करुन्य वुछान। आँखरु द्रायि यिम यिथु तिथु स्टैशनु मंजु नेबर। राजूहन बुलॉव टैकसी तु यिम बीठय टैकसी मंज।

राजू ब्यूठ ड्रॉवरस लरि ब्रोंठकनि तु लोग तस पनुन
पताह समजावनि। देद नाथ जी तु रानी बीठ्य पॅतमि सीटि
प्यठ। टेकसी द्रायि सिटेशनु प्यठु कनाट सॅरकुल किन्य,
बाराखंबा, मंडी हावुस, प्रगती मैदान वगॉरु। नाथ जियन
हेचोव देदि क्याताम नेबर कुन हावुन, मगर देद ऑस नु
योरक्यन आलमन। हवा दकु सुत्य ऑस तस ज़िफ हिश
गॉमुत्र। तसुंदिस देमागस मंज़ ऑस्य त्रेशि गॅल्य मॅल्य हेन्य
अंदरी अंदरी प्रें<Àìçvç> ज़न। अँछन खोतुस खुमार
हयुव, कनन गॅयस गुंगराय ... जंतु आलव हिव्य गॅयस
कनन ...

"हतुबी तारावती पख वसव यारुबल, पोन्त्य छुय ना
खारुन। बोज़ान छख ना बी?"

"आयस हबी आयस यिकि रछा कर ठहराव।"
अँमिस सूमावती ज़न छे बाँबुर आसान। पतु छेनु थफय

तुलान। तारावती ऑस पानस सुती कथ करान। तमि दित्य
वुछु सान बानन ठानु, मलु फश हयोतनख तु थँविन ओक
ओंद। बतु दीगजि तु स्निय लेज थँवुन दानस प्यठ, क्रोछ
थोवुन दानस मंज़। चोकस दितुन लिवन फश, लूंग्य चौरुन,
गरवंजि प्यठु तुलुन सरतलि नोट, तु कछस तल रोटुन तु
द्रायि ग्रायि दिवान दिवान यारुबल कुन। सूमावती वुछ, हना
चोमरॉवुन नस, कमरस दितुन कुनुय यल तु वँछ तारावती
कुन, "अँमिस वोत मे शे रेथ कन खेवान जि सरतलि नोट
अनय मगर बु छसस नु अथु वथय दिवान।"

"क्याज़ि नु" प्रुछुस तारावती हॉरॉनी सान।

"नँ बी यि यथ कतरि नँटिस सिफत छु तिति छा
कुनि।" सूमावती ददयुतुस काँफुसान जवाब। दपान छिना
अथ मंज़ छे त्रेश ताज़ु तु ठंडु रोज़ान।

"आहन बी आसि मे छु सरतलि नोटुय पंसद, लोति ग्वबि ति हरगाह कुनि सातु तुलहोन, त्रावुहोन ठीस मा लग्यस।" अदबी तु यि गॅयि पनुन्य पनुन्य बराबरदी। आदबी त्राव यूत वख क्याज़ि लोगुथ।"

"हतुबी ठानु बानु आँसुस दिवान। बतु स्युन थोवुम दानस प्यठ वुशनेरस। पतु मा छस यारु बलु जल जल फेरान। मे छुना पांतसरुफ।"

नँ बी पांतसरुफ ति गव पोज़ुय, दफ च़े छुय ना साजि आपस गरदयुक सोरुय रोदाद प्रुछुन आसान। च़ु कति म्वकलख तोरु जल जल।"

"पोज़य बोज़ख यि यारुबल छु अख सु समन बल येति नु थोद व्वथनस व्वंदय छु यिवान।"

"अदबी त्राव व्वन्य वन स्युना व्युना क्या रोनुथ" ?

हतुबी क्या राथ ओस ना नाथ जी शहर वोथमुत तोरय
ऑसुन नदुरदय ग्यडा खॉरमुच। जु त्रे कूचि त्राव्यम ग्वगजन
सुत्य।

"असि ति छि मनूजियस नदुरदय ग्वगजि स्यठा
पसंद।"

"अदुबी बनी ना सिन्य रछा तारुन्य। असि क्या
व्वपरॉज़ी छा? ति कॅरिथ बु छस ना च्चे निश तारान।"

"नॅ बी व्वपरॉज़ी क्याज़ि। असेय सिन मिलवन छे।
वुछ बी दीनु काकुन्य य्यारी छेय वॉचमुच यारुबल।"

"हतु बी अॅमिस कुस कारुबारु छु गरि। हश छस वुनि
ति मॉशि टोठा हिश। गरुच सॉरदय कॉम छस करान। यि छे
अॅती यिहॉय पेठ्यवॉन्य कॉमा करान। अती यारुबल तु अॅती
बागस मंज़। ति कॅरिथ कुस आडम्बर छुस। च्चु तु बु तु लुतु

बब। बेहिनु दोहदय दोहस यारुबलस प्यठ मसायि च़टनि
अदु क्या करि।"

"हतु बी यि गॉयि पनुन्य पनुन्य हवॉल्यहथ। बेयि नु
केंह।"

"वुछ तु कुनुय दॅरदयाव कुनुय आब। अपारि यपोर
बटु मुस्लमान अकी गाठु पोन्थ खारान। पानुवॉन्थ कथ
बकवास करान। न्वशन तु कोरदयन हुंज़ दौददय कांगुर।
कोताह मज़ु छु यिवान।"

"नॅ बी अमि अलावु छु ति क्या बेयि सानि खॉतरु"
कथ कथ करान बेछि बॅठिस प्यठ। नॅटय थॅविख ओक
ओंद। अथु पॉनिस मंज़ त्रॉविथ बेछि पोन्थ दोछनि।"

"हतु बी गछ हुकि छय वेस बिहिथ।" तारावती युथुय
साजि वुछ तस आयि नु वतु कुनि स्व गॉयि तस नॅज्यदीख तु

रँटुन नालुमति। तिमव लोग चॉटिस सुत्य चोंट तु लजि
सोरुय मँश<ÆjLç> कथु बकवास करनि।

सूमावती ति फीर सुरसुय यारुबालस। गरा प्यारी निश
गरा मीनावती तु गरा जॉनु देदि निश। बोस येलि लोचरोवुख
तु लँज तारावती वँन्य दिनि। येलि नु तारावती कथव तलय
म्वकलेयस स्व गँयि परेशान। गरु वॉतनुच पैयस बांबुर। मनू
जी आसिहेस बतस प्रारान। येलि नु तारावती कुनि पॉठ्य
म्वटेयस तमि तुजि पां दवछ जोराह त त्राव्यन तस फयरन
नालु किन अंदर।

हतुबी क्या बी रोवुय पलव हबी कुचुनॉव्यथम। ज़न
हबी छुय पां तसरुफ। तारावती चँज़ ज़ोरु क्रख नीरिथ।

0

नाथ जी गाबरदयोव। "काकने केंहे दँलील? चु केहे
दवहलि स्वपुन वुछान?" च़े कमी सुत्य आयी पलव

कुचनावनु येति नय चोन सुंब ति पां फयोर छु कुनि। देदि
गॉयि कुनी दुनन ज़नतु मच्चि नेंदरि मंज़ हुशयार गॉयि। "मे
हबा लजायि अँछ हिश तु वाचायस गरु पनुन। रेब्य आरु
बँठिस प्यठ ऑसुस पनुन्यन यारुबल काकन्यन सुत्य। वाय
दयि क्याज़ि कॅरिथ दरबदर। हाय कम पाफ ऑस्य
कॅरदयमित।" तान्य बयूठ राजू ड्रॉवरस सुत्य इशारु करनि।
शायद ऑस्य तिम डेरस नखु वॉत्यमुत। 5/80 ,
आशयाना, मयूर विहार I.

"डेडी अँस्य वॉत्य" तँम्य दिच्च बडि मॉलिस कुन
क्रख। अदु सा मोला वारु कारु" वौथुस नाथ जी।

टेकसी ठहरेयि अशियानाहस निश। राजू वौथ ब्वन।
मॉलिस मुचरोवुन दरवाज़ु। नाथ जी वौथ गाडि मंज़ु ब्वन।
नरि पिलनाव्यन देदि कुन तु वोननस, "पख बी वस वारु
वारु वॉचुख राजू सुंदिस डेरस प्यठ।

देदि दिच्च दोति लूट फेकि पेठ्य दारिथ। दँछिन नँर
पिलुनाँवुन नाथ जियस कुन तु खोवुर अथु सीटिकुन
डँखरावान कजन जंगु नेबर तु वँछ वारु वारु व्वन।

राजूहन दित्य ड्रॉवरस पाँसु, डिकी मंज़ कोडुन
सामानु। अख बैग त्रोवुन नाँल्य तु ब्याख पिलनोवुन माजि
कुन। अटाँची तुजिन तु द्राव ब्रॉह ब्रॉह। नाथ जियन कँर देदि
थफ तु द्रायि तिम राजूहस पतु पतु। राजूहन दबोव लिफटुक
बटुन। दरवाज़ु गव येलु। साँरी च़ायि लिफटस मंज़। तँम्य
दबोव पाँचमि पोरुक बटुन तु लिफट द्राव तीज़ी सान हयोर
कुन। देद गँयि लिफटस सेमंज़स बिहिथ। सारिवुय त्रोवुस
असुनाह। राजूहन नेमरोव पान तु वोननस, "देदी यथ मंज़
नाय छिनु बेहान। लिफटस मंज़हय छि खडा खडा रोज़ान,
व्वथि थोद तु तुजिन अथन थफ कँरिथ थोद। देदि त्रोव ज़्यूठ

व्वशा। ऑनस कुन याम नज़र पेयस तस च़ंज कुनि क्रख
नीरिथ। हतुबा यि क्या बा ऑनु ज़ॉपानाह हियुव।

वुछथय देदी राजूहन हय खॉरनख ऑनु ज़ॉपानस।
ऑनु ज़ॉपानस मंज़हय नियी पनुन गरु। ज़ॉपानुक तसवुर
कॅरिथ खोत देदि बुथिस व्वशलुन हयुव कम ताम ख्याल
गनेयस देमागस मंज़। अहन बा यां खारदायनस चॉन्य
मॉल्य ज़ापानस तु नतु व्वन्य चॉन्य नेचिव्य। "मगर
कुहरदय कत्यो छि।" सारिवुय त्रोव असुनाह तु राजू
वोथुस। "देदि येमिक्य कुहरदय छि यिम बटन, यिमन योत
वनख तोत निनय। मगर देदि कोर नु ओर कुन गोर तस
प्यव गफार रॉथुर याद। कथि कथि प्यठ ओसुस वनान "
हतु बी तारावती मे मु वन बातु, मे छख यिमन नखस प्यठ
सरवु जुवुन गॅरु वातनॉवमुच़। वुनि ति छम फेक्यन दग। च़े
ओस्या कम वज़न।" गफार रॉथुर ओस सरवु जुवुन

हमसाय तु यार। तिम आँस्य यि दँप्य जि ति अकी नालु जँट
कडान। दोहय दोहस यिकुवटु आसान। चाहे गरु कामि
आसहानख या बाज़र कामि यिमन ज़न आँस पानुवाँन्य
कुनी अँट। सरवुजुवनि स्त्रगुवास सपदनु पतु ओस गफार
रॉथर ज़न यिहंदि गरुक ति खानसार। देदि व्वतलेयि अकि
अकि तिम साँरी बेकुल ख्याल देमागस मंज़ यिम तँमिस
अज़ ब्रॉह लग बग शेठ वँरी आँनु ज़ापानस मंज़ बिहिथ
मालिनि प्यठु वॉरदयुव तान्य किस सफरस दोरान
गनेयायि। तसुंद रॉसु रॉसु ज़ापानक्यव चुरन्यव किन्य
सरवुजुवस कुन अँछ फिरदय फिरदय वुछुन, दिलुच
दुबरारय, अँछन मंज़ ओश, देमाँगी तज़बज़ुब तु वारयाह
केंह। देदि खोत बुथिस ज़्यादय व्वशलुन। स्व वातिहे खबर
कोत कोत, खबर कम आलव गछुहानस कनन मगर लिफट
रुक्योव तु दरवाज़ गव यँलु। राजूहन कँड देद जल जल

नेबर तु बाक्युय सॉरी ति द्रायि नेबर। नेबर नीरिथ त्राँव देदि
 पोत फीरिथ ऑनु ज़ॉपानस कुन आरुकचव चेशमव नज़र तु
 अंदरी त्रोवुन असुन। देदि रूद ऑनु ज़ॉपानु कानि तल।
 युथुय दौयमि द्वह राजू दफतर द्राव तमि वोन ब<æ[e]>
 ऑजज़ी सान तस तला मे खार तु बेयि तथ ऑनु ज़ांपानस।
 अमी छिना वनान शुरदय तु बँड्य छि हिवी आसान। य्वस
 कल नेरख स्व गछयख पूरु गछन्य। देदी मे गव दँफतर चेर
 बु खारथ शामस बाँग्य, ति कँरिथ वन डेडी जियस या ममी
 जी तिम खारनय। नाथ जी वोथुस " चु किहे छख देदी
 शुरदय गिया हिश करान," पतु येलि ब्चन वसव तमि
 विज़ि खारुहोथ लिफटस याने ऑनु ज़ॉपांस।

राजू द्राव दफतर, नाथ जी ब्यूठ आशानि सुत्य
 क्याहताम छुकावनि तु देद आयि तु बीठ रोबूद हिश अँकिस
 कूनस मंज़। नाथ जियन च्यून ज़ि देदि गव हतख। सु आव

तस ब्रोंठकुन नरि कॅरनस थफ तु कॅडन नेबर। "व्वलय देदी
बु हय खारथ ऑनु ज़ॉपानस। तॅम्य दबोव बटुन तु केंचि
कॉल्य खुल्योव लिफटुक दरवाज़। बटनस प्यठ थॅवन बेयि
ऑंगदज, दोयमि अथु कॅरुन देदि थफ तु च़ॉनिन लिफटस
मंज़। देद यान्य लिफटस मंज़ च़ायी योत स्व गॅयि पथर
बिहिथ तु वोनुन नाथ जियस। "मे मा बा वन व्वन्य किहीय,
बु बेहमु पॅथरिस प्यठय।" नाथ जियन च़्यून देदि हुंदि
दिलुक हाल तु वोननस नु किहींय। सिफर नंबर दबोवुन तु
ऑनु ज़ॉपान वोथ तीज़ी सान ब्वन कुन। देदि करि अँछ ज़ु
बंद तु लॅज कमन ताम ख्यालन बेयि पफ्युर दिनि। तसुंदि
सोंचुक तसवुर ओस तसुंदिस बुथिस प्यठ अलग अलग
ग्रायव किन्य इज़हार स्पदान। लिफट वोत बॅन्यमिस पोरस
प्यठ मगर नाथ जियन दबोव बेयि हेरमि पोरुक बटुन तु
लिफट द्राव तीज़ी सान हयोर कुन। यिथय कन्य करुनॉव

नाथ जियन देद हेरु ब्वन त्रे चोर चक्र तु आँखर दबोवुन
पाँचमि पोरुक बटुन, लिफट रुक्योव तान्य द्राय नाथ
जियिन आशोन्य रानी नेबर तु दिचन देदि बडि हटि क्रख।
"दंदन कर तय चंदन लुशे वॉरदयुव निशे वॉचखै।" देदि
खोजि अँछ। न्वशि हुंद वनुवुन लोगुस ज़नतु क्युल। अथु
डँखरॉविथ वँछ जल जल थोद तु द्रायि आँनु ज़ाँपानु मंज़
नेबर। मगर अति ओस नु सरवु जुवुय ख्वश आमदीदस नँ
हश माँज आलथ हेथ तु नँ कुनि गफार रॉथरदय बूद। स्व
चायि रॉसु रॉसु पनुनिस कमरस मंज़ ज़ि न्वश गछुम नु बेयि
टाँनु करुन्य।

वख गव गुज़रान। दिलि आमतिस आँस्य व्वन्य देदि
यानी तारावती शे रेथ गॉमुत्य, मगर यिमन रेतन मंज़ ओस
वारयाह केंह सपुदमुत। देदि हंुदिस सेहतस सुत्य सुत्य
आँस तसुंदिस स्वबावस तु सोँचस ति कति कोर फरख

आमुच्च। स्व आँस नु व्वन्य स्वय तारावती, मँछिज, दिलबर
 तु कथु कुतौज। स्व आँस नु व्वन्य गरिकयन बाँचन सुत्य ति
 कथु करान। स्व आँस अँकिस कूनस मंज़ तँक्यस सुत्य
 डोख दिथ दौय दवहस ज़नतु दुयान आसान। पनुनि कमरु
 मंज़ु आँस नु नेबरुय नेरान। अँती आँस खेवान चेवान तु
 त्रावान डाफ। बव्न वसुन ओस तस मुश<ÆkçÀuç>
 गछान। व्वन्य आँस नु तस आँनु ज़ाँपानस खसनस सुत्य ति
 दिलचसपी। थोद वोथनस ति आँसुस नु सामरथ तु नँ कुन
 गछनुच कल। ति कँरिथ कुस हमदरद ओसुस अति यस
 निश गछिहे। काँशिर गरु जोराह आँस्य। अख ओस अकिस
 अंदस तु ब्याख बेयिस। अकि दौयि फिरि नियायि न्वशि
 तोर, पतु मा नियिहेस दोहय। तोरि ति गँछा कांह युन,
 योरय क्या गछिहे लँटा हिश। तस ओस नु नंबर यि याद
 रोज़ान। ग्वडु आँस्य साँरि फलेट हिवी, यिमय गंदक डबु

हिव्य। कुनुय गरुत कुनुय नकशु। यनु सपरु सॉबनि बदलु
सूरी सॉबुन चायि तनु ओसुस राजूहन कुन गछुन मनाह
कोरमुत। दोपमुत ओसनस तस शोठस गॉयि खजिल खॉरी
येलि सूरी सॉबन वोननम "आपकी माताजी दिन के दो बजे
हमारे Iार मै Iुस गई"। नाथ जियन ति ओसुस पतु
नेबर नेरनस ठाख कोरमुत। दोपमुत ओसनस बिना बताये
कांसि निश गछुनस छि येति बद तमीजी मानान।

देदि आसु यिमु कथु दिलस सनेमच। सख दिल
मोलूल आंस गॉमुच। पनुन गरु प्योस बेयि याद। सु आंगनु
आंगनु फेरनु, योत ख्वश करि तोत गछुन, योतताम नु देहन
गरन नून तील दियिहे तोतमाम आंसुस नँ यड खसान।
कूचि फिरि ओस नाथ जी स्कूलु यिथ पनुन दरवाज़ु मुचरिथ
कुठिस मंज़ शोंगिथ आसान मगर देदि आंस नु पतुहॉय
रोज़ान। ग्वडु मा आंस योरक्य पाँठ्य थपुथफ तु चूर चूर।

तति ऑस्य दारि बर यलय आसान। ज़्यादद से ज़्यादय
 नेबुरदय बरस हॉकल थव्यायख। अदा येतिक्य पॉठ्य
 दरवाज़स प्यठ दरावज़। अंदुरदय हचुव तु नेबुरदय
 शेशतरुक। कुलफन प्यठ कुलुफ। काँहय बेल करि ग्वडु छु
 चुरन्यव किन्य वुछुन ज़ि कुस छु। ओसय ज़ॉन्यकार तु
 खोलुन नतु चूर बदमाशा ज़ॉनिथ दरवाज़ त्रोपरिथ थवुन।
 ग्वडु ज़न छु योरक्यन लूकन द्रागन बुथ होवमुत देद ऑस
 सोचान। देदि पैयि साजि तु हाजरु याद। हरगाह ददवह खंड
 गछिहेस तिमन डेंशनस दपान आसस, च़े क्या बी वुछानुय
 छिय नु। ज़मामा गोय सॉनिस आंगनस अच़नस अकतुय
 ऑसी देद तु काख यि सख याद करान। दपान ऑस्य अमा
 तारावती छा सना वारय? तसुंज़न कथन हुंद छु लोल
 आमुत। "पगाह दॅप्यज़्यस यपॉरदय रदवय हावुन
 मुलाकाथाह करुहाव।" तिम ऑस्य साजस वनान। तिछुय

कथा आँस हाजरुन ति तस ति गँछनु तारावती नज़रव
डलुन्य। देदि आँस्य साजुन्य तु हाजरुन्य आलव बार बार
ज़नतु कनन गछान।

देदि तुल आँनख थोद। दोति लोंचि सुत्य व्वथराव्यन
अँछ। मगर ओश ठँदरदयोस नु। ओरु चायि रानी, तमि
युथुय देदि हुंद रुप वुछ, स्व वोलेयि। "देदि क्या सना गव
हंगतु मंगु, खेथ चेथ कोर कुन कँरिव अदु। स्वखु म्वखु छिव
ओश त्रावान। अँस्य गछव वारय रोजुन्य। ज़न अँन्यवु असि
ज़बरदँसती। गछान क्याज़ि छिव नु वापस, पनुन्यन
दरदिलन निश।"

"बस बस व्वन्य मु लॉगिव मँचलु, शिग ति छव नु
गछान।" रानी दिच्चु ज़ोरु ज़ोरु क्रकु। नाथ जियन बूज़
अपारि तु तौर यपॉरयमिस कुठिस मंज़। ग्वडु कौरुन
दरवाज़ु बंद पतु मत्योव यिमन दवशवनुय।

" तवहि क्या बी गव हंगतुमंगु। आलम कथ तुलवु नखस।" नाथ जी वोथुख शरारतु सान।"

"यि प्रछ तु माजि पनुनि। हंगतु मंगु बीठ वदनि। ज़न छुस लोयमुत कांसि। अँमिस छे नु शिग ति गछान।"

"केंहे देदी केंहे दलील छे? कथुय प्यठ आँसुख ओश हारान" प्रछुस नाथ जियन तलख आवाज़ि मंज़।

" अदबा बु कथ रँटवुहोस बाँचव दवयव। चु ति छुख मैय पोशान अँमिस कोनु छुश केंह वनान।" मे क्या अँमिस वोना केंह।" वँछुस माँज बेगरि आवाज़ि मंज़। "यि छुम मंज़्य मंज़्य पनुन गरु याद पेवान। पनुन्य साँथी ंसंगी छिम याद पेवान। अँती छस दिल मोलूल हिश गछान। साँचान छस गोवय तु गोव क्या असि। कथ मुसीबतस लँग्य। कम पाफ आँस्य कँरदयमित्य। यिमनय ग्वतन छस बार बार गछान। अति छुम न पानस ताम रोज़न। ओश छुम फटान।

करु क्या हर गाह पिलिहा मे सोज़ तु वापस कशीरि। दपान
छस तँती मरुहा। आवरिन गँछमनु रावुन्य। देद आयि बेयि
अकि फिरि जज़्बातन लायनु। " यि हॉव्य तुहोन काँसि
स्यकाट्रस्टस। अँमिस छि ज़न काँडय डँल्यमुत्य वँछ रानी
रॉनिस कुन। नाथ जियस गव नु आशनि हुंद यि वनुन
बरदाश। सु वोथ तस रोबु सान। "काँड्य छीय च़े डँल्यमित्य
बकवास कर बंद।" रानी द्रायि शरारतु सान कमरु मंज़
नेबर।

नाथ जियन हयोत माजि दिलासु ददयुन तु मठ मदारु
करुन। स्व वँछस कमि हटि "तला मे सोज़ वापस, बु ना
हेकु नु यिमन सीमटु कुठयन मंज़ रुज़िथ।" नाथ जी ब्यूठ
माजि ल्वकटिस शुरदय सुंददय पाँठ्य समजावनि तु सबुज़
बाग हावनि। यिथु तिथु गयि देद मुतमयिन तु बीठ छवपु दम
कँरिथ। वख गव गुज़रान। देद गँयि द्वह खोतु द्वह पथ पथय।

स्व ऑस हरान तु छवकान। द्वहस ऑस बालकुनी (डब)
प्यठ अँकिस कुरसी प्यठ बेहान तु नेबरिमि सडकि प्यठ वतु
पकुवन्यन तु गाड्यन वुछान रोज़ान, पतु येलि अँछ
थकुहॉनस स्व ऑस बिस्तरस मंज़ अचान। गरिक्यन बाँचन
सुत्य नु खास कथा बाथा करान केंह। सिर्फ आ या नाहस
मंज़ जवाब दिवान। खेन चैन ति ओसुन कम कोरमुत सिर्फ
ऑस कनु फिसराया करान आसान। रानी ऑस रॉनिस
कथि कथि प्यठ वनान जि देद छे अँददरदय अँददरदय
व्वहवान आसान।नाथ जि ओसुस बोज़नह करान तु
खँशमुहचव चेशमव वुछान।

ऑस ति ज़न देदि वाक्य क्याहताम देमाँगी
तबदीलयि आमूच। स्व ऑस पानुसय सुत्य कथु फरान
आसान। मंज़्य मंज़्य असान आसान तु मँज़्य मँज़्य रोबूद
हिश गंटुवादन अँक्यसुय जायि बिहिथ गछान। ज़्यादु से

ज्यादु आँस पनुन सोंदूक खोलान तु पलवन क्यो चीज़न
अकि अंदु तुलान तु बेयि अंदु त्रावान। गरुकिस काँसि ति
बाँचस सुत्य आँस नु खास कथा करान केँह, सिर्फ आँस
सुबहस नेरनु विज़ि राजूहस दरवाज़स ताम पतु पतु नेरान तु
वुठ कुमलावान। व्वन्य ओसुन केँचव द्वहव प्यठु ति करुन
ति त्रोवमुत। आँखुर येलि नु अकि द्ववहु स्व बिस्तरु मंज़
द्रायी नाथ जियस लँज फिकिर। सु गव तस नँज़्यदीख, स्व
आँस सिर्फ कनु फिसरारय हिश करान तु आरुकचव चेशमव
सारिनय वुछान। नाथ जी गाबरदयोव, तस बास्योव जि देद
छनु वारु केँह। खबर क्या दलील छस। तँम्य कोर फॉस्तु स्व
डाक्टरस हावनुक। मगर देदि आँस नु हेकथ जि स्व वसि हे
व्वन। नाथ जियन कोर डाक्टर सुंद पताह। नन्योस जि
अँथ्य बुलाकस मंज़ छु अख डाक्टर बँन्यमिस पोरस मंज़।
नाथ जी गव डाक्टरस बुलावनि। डाक्टरन वौनुस जि सु

छुनु गरु गॅछिथ कॅसि ति मॅरीज़स वुछान। यि छु तसुंद
 ओसूल। तॅम्य ददयुत तस स्लाह जि सु अँनिन माजि
 ऊरदय। मगर नाथ जी किथु कन्य वालिहे देदि ब्वन। तस
 आँस नु थोद व्वथनस सुंब सामरथुय। प्यठु आँस क्याहताम
 वोरान ज़न। नाथ जी त्रहँरदयोव। तॅम्य वोन डाक्टरस।
 "जितना भी फीस बोलो में दूंगा लेकिन आप मेरे साथ
 चलिये।" यिथु तिथु म्वटयोव डाक्टर तु ग्वडु रँददयनस
 पांछ हथ रूपयि एडवानुस बेयि थँवनस मिनत ज़न। नाथ
 जियस प्यव डा. सुलतान डार याद युस तस सुत्य परान
 ओस मगर दूरि बेयिस गामस मंज़ ओस बसान। डाक्टर
 सुलतान ओस दोह राथ मॅरीज़न येलाज करान। येलि अकि
 द्दहु नाथ जी निस मॉलिस पापा जियस ख्वरस लजाव डा.
 सुलतानन वातनायाव सु पानय हस्पताल तु कौरनस
 येलाज। दवा ताम ओसुस पानय अँनिथ दिवान। नाथ

जियन त्रोव व्वशा तु द्राव डाक्टरस ब्रोंह ब्रोह लिफटस कुन।
डाक्टर गुपताहन येलि माता जी बुथिस कुन नज़र त्राँव
तँम्य कौर तोबा तोबा तु वोनून नाथ जियस " यि छे मरन
सर " युथुय पतु दूर बीन लॉजनस तु नबुज़ वुछनस तँम्य
त्रक्रॉव्य कन तु प्रुछन देदि कुन "माता जी क्या बात है,
कहा दरद है?"

णाता जी रूज़स तोरु हॉंगुल हिश वुछान। सिर्फ
होवनस दिलस कुन। वुठ कुमलॉविन तु त्राँवन नाथ जियस
कुन आरुकचव चशमव नज़र, वुठ फिसरारय करान वँछस
"दपुस दिलस छुम तलवास, कनन छिम पौत आलव हिव्य
गछान। दिल छुम रावान, मथ छुम गछान गरु गछुहा, सॉरी
आसनस प्रारान, व्वन्य कुत्सि कालस प्रारनावख"। यि
बूज़िथ त्रहरदयोव नाथ जी। यिथु कन्य ऑस नु स्व ज़ाह
बोलान। तस गव देदि हुंद पूर तसलहा। शायद मा डँज

पज़ी। तस पेयि रानी हंुज़ कथु याद। मगर ज़ेवि वौनुन नु
केंह सिर्फ रूद देदि कुन मुदय गंडिथ गोरु सान तसुंज़ वुठ
फिसरारय बोज़ान। "व्वन्य कथ छिवोम आलवस प्यठ
आलव दिवान। पकानय छस पकान। जल्दय वातु ... देदि
त्रॉव डाक्टरस कुन दोलु नज़र। डाक्टरन त्रोव देदि हुंद
नबुज़ येलु तु नाथ जियस कुन गिलुनोवुन कलु। नाथ
जियन च्यून ज़ि देदि ददयुत कदम। तँम्य तुल यक्दम त्रेशि
गिलासु अथस क्यथ तु अख त्रेशि चमचि त्रोवुन देदि
ऑसस मंज़।

